

TABVLA SECVNDA Aphricæ.



IN hac tabula de Æthiopia agitur, quam duplicem esse scias, Asiæ scilicet, & Aphricæ. Quarū una India dicitur, de qua in tabulis Asiæ factus est sermo. Æthiopia autē appellata est ab Æthiope, Vulcani filio, qui illi præsuit, ut Plinius ait. Circa occiduum montuosa est, arenosa in medio, ad orientem deserta. Plurimas gentes habet, diuerso uultu, & monstruoso, specie horribiles. Primi omnium mortaliū creduntur, uerissimiq; indigenæ, & seruitutem nunq; experti, semper genti libertas incolumis māsit. Primo deorum cultum, apud eos institutum memorant, Primasq; sacrorum ceremonias. Duplicem literarum usum ut quæ sacræ diacerent, sacerdotibus duntaxat notæ essent: alterum earū, quæ uulgò paterent. Fuerunt tamen literarum figuræ haud tales, ut ex illis sillabæ coalesceret, sed animantibus, extremisq; hominum partibus, uarijsq; instrumētis artificum perq; similes, singulisq; sua inerat figuris significatio. Vt in accipitre celeritas, in crocodillo malū, custodia in oculo, sicq; aliæ in alijs. Ex sacerdotibus, quem phanatico cursu circumferri uiderint, omnium sanctissimum iudicant. Quem ubi regē creauerint, ueluti numen ei insit, aut sit ad minus diuina prouidentia eis datus, adorant. Vitam is agere statuta legibus debet, omniaq; facere iuxta patrios mores. Neminem neq; premio, neq; pœna afficere. In quem autē animaduersum uolet, lictorem signum mortis habentem, ad eum mittit, quo conspecto, confestim quisq; ille est, domum reuersus, sibi mortem consciscit. Ferunt quoq; eis consuetudinis esse, amicos ultro, in regis morte, uita defungi, existimantes eū interitum gloriosum, ueræq; amicitiae testē. Plures solis propinquitate nudi agunt, ouillis caudis pudenda obtegunt, & pauci omnino pecorum uestiuntur pellibus. Alij subligacula capillis contexta, ad medium corpus inducunt, pecuariam rem uulgo exercent, pecora pusilla, admodū duri hirciq; uelleris, canes & ipsi nihilo maiores, cæterum asperi & pugnaces. Milij, hordei q; frequēs usus, unde potū etiā conficiunt. Cæteris carent frugibus, præter palmulas, easq; perraras. Quidam herbis uictitant, tenuioribus harundinum radicibus, carnibus, lacte, & caseo uescuntur.